

Korosu

Pauru okusiwa Korosu wānà kō pè maekwerà

Imovyvya

Aā kareta Janejare'e 'Āg omotekokuwa Pauru tokusiwa Korosu wānà kō pè maekwerà. Nooi ajamā'ē Pauru Korosu taa kyty. Opātavōarà mō kōrijō omonooka a'e wānà kō gyty, Jesu rekoa tomojenu ijupe kō iko. Parasi eu emimono mō pè. A'e ywesō omotekokuwa Korosu wānà kō Jesu rekoa rē iko. Ajamā'ē Pauru oja'a jē ee kō, ke'īrōwā teipe ekoi iwyi kō remē. Pauru wenu ekoa kō rewarà, jimopā'āga pè tui remē, Romā taa pè.

Kee jaa āmē wenu Pauru: “Janejare'e ayvu rē poromo'e rā'āga māe kō uu Korosu wānà kō pytery pè. A'e kō omomoi kō tarepe ayvu e'ey wyi”, ejaa wenu. Aepo jaa wenu remē, kareta okusiwa imono ijupe kō, imotekokuwaa kō rōmō. Kee e'i ikusiwa: “Tapejimorepeoka e'ā ikō poromo'e rā'āga māe kō pè nē. Kiristu rōwā omo'e kō. Wekoa rupi tē poromo'e rā'āga iko kupa ipi... Ajawyi tapejapyaka e'ā ikō ijayvu kō rē peiko ipi nē”, e'i ikusiwa (Krs. 2.8). Aā kō rupi okareta omonooka. Tikiku. Onesimu. Āwī kō rupi okareta omonooka Korosu wānà kō pè.

Pauru ojikuwa ijupe kō

1 ¹⁻²Ije Pauru. Janejare'e remimota rupi Kiristu Jesu remimono rōmō aiko. Aā kareta akusiwa ajupa pejē, Kiristu koty rewarà kō pè, Korosu taa wānà kō pè. Kiristu revejē peiko māe kō tē pejē. Timoteu reve orokusiwatà imono peupe. Janeretārā vo mē'ē tē Timoteu, Jesu koty rewarà rōmō.

Janeruwasu ikō tapenereko katu okatuaya rupi penereko ipi nē. Tapepy'amopiryvpy katu ikō penereko nē.

“Pene orerory mē'ē oromome'u Janejare'e pè ipi”, e'i mē'ē

³Janejare'e pè oroporegeta peupewarà mō ipi, Janerōvijā Jesu Kiristu Ruu pè. Oreroryvay pene rewarà mō oroporegeta peupewarà mō ijupe

ipi. ⁴ Kee jaa penewarà oroenu: “Ojirovija katu Kiristu Jesu rè kupa”, jaa oroenu. “Pirujê Janejare'e koty rewarà kô wauvay kupa ipi”, jaa oroenu teve. Ooreroryvay aepo jaa renu âmẽ.

⁵ Aje ywete Janejare'e ayvu e'ey Jesu rewarà. A'e peenu ypy remẽ itôkô, Janejare'e pyri jaiko karuaru mãẽ pekuwapa. Ajaate peãrô ywete ipyri peikoa rà ky'y. A'evoa rè oromoe'e Janejare'e oroiko ipi.

⁶ “Janejare'e poroauvay okatuaya rupi ipi”, jaa peenu ypy remẽ, kee pejê: “Aje ywete a'evô”, pejê enu ipi. Aepo jaa peenu remẽ itôkô Janejare'e pepy'amoteeoka. Ijayvu pepy'a oporakapa. Áwitô a'evô peiko Janejare'e ayvu peenu remẽ, áwivo ve âmô kô age'e remẽ wenu kupa remẽ. Âmô taa taa wânà kô wenu remẽ, a'evô ekoi teve kupa ipi. Ajaire pirujê vyv wânà kô a'evoa wenu remẽ, a'evô tevetà ekoi kupa.

⁷ Parasi ypy itôkô a'evoa omojenu pejê jypy remẽ. Oreremiauvay rômô Parasi ekoi. Kiristu remígwai e'e rômô tè a'e ekoi, orevo. A'e oromono pekoty Janejare'e ayvu tomojenu pejê remẽ itôkô Janejare'e ayvukwerà rupi katu omojenu pejê.^a ⁸ Âmẽ ajaire ojivy uu orekoty remẽ, kee jaa omome'u oreupe:

– Janejare'e Ág rupi Korusu wânà kô poroauvay iko ipi, e'i oreupe.

⁹ Ajawyi Janejare'e pè oroporegeta peupewarà mô oroiko ipi. Penewarà oroenu ypy reme wyive oroporegeta peupewarà mô ijupe ipi, ajaate mãerã rômô ky'y. Kee oro'e ijupe peupewarà mô ipi: “Papa, emotekokuwa kô neÁg rupi, neremimota tokuwa kupa”, oro'e. “Pirujê neremimota rè emotekokuwa kô”, oro'e ijupe peupewarà mô ipi.

¹⁰ Janejare'e tekokuwaa rupi peiko remẽ, pekuwatà emimota rupi peiko. Imorya rupi peikotã âmẽ. Ivoa rupi peiko tevetà. Âmô, pejimotekokuwaokatã Janejare'e pè. Ajaate pejimotekokuwawaytà ee âmẽ peiko. ¹¹ Kee oro'e teve ijupe peupewarà mô:

– Epy'amokasiay kô ywete nekasiay wetea rupi, tojirovija jê iko imomãatã nere kupa, ojimomorijau ipe kupa remẽ. Taory jê iko kupa, ojimomorijau ipe kupa remẽ, oro'e ijupe peupewarà mô.

¹² Janejare'e kee e'ipa peupewarà mô: “Tete oike erena pè eupewarà kô rômô kupa, awyje epyri toiko kupa”, e'ipa peupewarà mô. Ajawyi ikô tapemoe'e penereko katua rè peiko ipi nê, a'e pejê. ¹³ Janejare'e tè janerekyipa nivoi tekoua pe wyi janerereko, ájãgai rövijã po pe wyi. Janereraa Wa'yry remígwai kô rômô, eeevejê tijaiko. Wauvay Wa'yry ereko. ¹⁴ Aje ywete Jesu remígwai tè jane ky'y. A'e tè omãñô janerekovijarerã rômô. Janeaiwererã oitypyypyiokapa janewyi omãñô rupi. Ajawyi Janejare'e nomo'y'ãi janeaiwererã janere ky'y.^b

“Jesu ywesô ikasiay pirujê moma'e kô 'arã kytywarã rômô iko”, e'i mãẽ

¹⁵ Nomãëtyti ee mãẽ tè Janejare'e. Nojisaokari iko mãẽ tè Janejare'e. Ajamãẽ Kiristu rè jamãẽ remẽ, Janejare'e rè ivo teve jamãẽ kuwa. Uu vo

^a 1.7 Krs. 4.12 ^b 1.14 Eps. 1.7

ywete Ta'yry ekoi. Nuveive Janejare'e reminõgwerà mō remeve, uvepa teãmã Kiristu. A'e pirujẽ Janejare'e reminõgwerà kō 'arà kytywarà rōmō ekoi. ¹⁶ Janejare'e pirujẽ oinõoka remẽ, Kiristu tẽ oinõ kō. Yva pewarà kō oinõ. ãmõ, vvy pewarà kō teve oinõ. Áwitõ ojisa mõe kō oinõ erokwa, ãwĩvo ve nojisai mõe kō oinõ erokwa. Janejare'e remĩgwai yvapewarà kō ve oinõ erokwa. ãmõ, ija mõe kō oinõ teve.^c Pirujẽ ikasiay mõe kō nomã'eytyi mõe kō ve oinõ teve. Wãi wãisõ oinõ erokwa. Pirujẽ uve mõe kō Kiristu tẽ oinõ. Kiristu pewarà mō Janejare'e oinõoka kō pirujẽ.

¹⁷ Pirujẽ age'e uve mõe kō reko e'ãve, Kiristu ekoipa teãmã. Age'e pirujẽ uve mõe kō wereko jẽ okasia rupi ereko. Pirujẽ wenañõma kō erokwa, tatui kupa upa. Ajaate wereko kō jẽ ereko. ¹⁸ Janerõvijã wasu rōmō ekoi ipi, jajirovija ee remẽ. Jane'y rōmō ekoi. Áwitõ vvyra rãkã o'y rẽ ojipy remẽ tẽ katu ekoi. Nijui ãmẽ. Áwĩvo ve jane jaiko Kiristu rẽ jajipy jaiko remẽ tẽ katu jaiko. Ajawyi i'Ãg rupi jaiko ipi. Poroãparõ mã'e teve a'e. ãmõ, a'e ypy opoera omãñõ maire. [A'e ywesõ ikasiay mãñõa wyi ãmẽ iko.] Ajawyi pirujẽ weminõgwerà kō 'arà kytywarà rōmō ekoi ky'y.^d ¹⁹ Áwitõ Janejare'e oiko teãmã, ãwĩvo ve Ta'yry ekoi. Ojevo jẽ Uu reve ekoi. Janejare'e remimota rupi katu tẽ a'evõ ekoi. ²⁰ A'e rupi jajimory kuwa Janejare'e rẽ jaiko ky'y. Janejare'e nisirovijai 'ete mijã. ãmẽ Janejare'e e'i oupe:

– Era'yry mãñõa rupi mirã kō arojivyokatã ekoty, tojimory mijẽ ere kupa ky'y, e'i.

A'evõ wereko ãmẽ. A'e rupi teve pirujẽ weminõgwerà kō werojivyoka okoty. Áwitõ vvy pewarà kō, ãwĩvo ve yvapewarà kō. Jesu Kiristu vvyra jipokana rẽ omãñõ maekwerà rupi Janejare'e “awyjepa” e'i janeaiwererã kō pẽ ky'y.^e

²¹ Jypy remẽ itõkõ waite peiko Janejare'e wyi peiko mijã. Ijãpã rōmō tẽ itõkõ pejẽ peiko mijã, nivõi teãmã peiko rewarã mō. Nivõi mã'ẽ rẽ kōrijõ tẽ itõkõ peja'a peiko ipi mijã. Ajawyi napejimoryi 'ete Janejare'e rẽ peiko ipi mijã. ²² Ajamã'ẽ Janejare'e penerojivyoka okoty rewarã kō rōmō tapeiko ky'y. Pemojimoryoka wee penereko ky'y. Wa'yry mãñõa rupi a'evõ penereko ipi. Ajawyi peneraatã wena kyty opyri tapeiko karuaru ky'y. Ivo katu mõe kō rōmõ peneraatã opyri. Ava jẽ rōwã kuwa omõ'y nivõi mã'ẽ pene ãmẽ ky'y. [Ava jẽ rōwã wesatã nivõi tekoua a'e pẽ.] ²³ Janejare'e ayvu e'eay Jesu rewarã ojenu peupe remẽ wyive itõkõ pejirovija ee peiko. Peãrõ ipyri peikoa rã. Ajawyi tapejirovija jẽ ikõ ee peiko nẽ, a'e pejẽ. Tapejimokasi jẽ ikõ ee peiko nẽ. Jesu rekoa tapeity e'ã ãmẽ peiko. Áwitõ peupe Janejare'e ayvu e'eay ojenu, ãwĩvo ve pirujẽ mirã kō pẽ ojenu jenu okwa ipi. Vvy popy kyty Jesu koty rewarã kō omõjenu jenu erokwa. Ije ve, Pauru, amõjenu jenu teve erokwa ipi, Jesu remĩgwai rōmõ.

^c 1.16 Nojimoãpãive Janejare'e rẽ kupa, oinõ kō remẽ. ^d 1.18 Eps. 1.22-23

^e 1.20 Eps. 2.16

Pauru oposikoawerà omome'u remēwarà

²⁴Kiristu ayvu katu amojenu erokwa ipi. Ajawyi emomorigjau erereko kupa. Peupewarà mō ajimomorigjauoka ajupa. Kee e'ipa Janejare'e eupe: “Nejimomorigjau remē tē katu eayvu katu ojenutà Juteu rōwā mǎe kō pē okwa”, e'i. Ajawyi erory jē aiko, ajimomorigjau ipe aiko remē. Apota Kiristu koty rewarà kō mokasi tojirovija jē ee kupa, ajawyi. ²⁵Kee e'i Janejare'e ije: “Emokasi Kiristu koty rewarà kō, āmē ywesō tojirovija ywete ere iko kupa”, e'i. “Emotekokuwa Juteu rōwā mǎe kō eayvu rē. Pirujē eayvu rē emotekokuwa kō, tokuwa kupa”, e'i ije.

Ajawyi ijayvu rupi āwīvo aposiko peupewarà mō aiko ipi. [Eremikusiwarerà rupi ve poromotekokuwa ajupa ipi.] ²⁶Karamoe remē Janejare'e kee e'ipa oupe: “Juteu rōwā mǎe kō ve arojivytà epyri toiko karuaru kupa”, e'ipa oupe. Ajamā'ē a'evoa nomojikuwaokaive mirà kō pē mijā. Age'e remē tē katu omojikuwaoka Kiristu koty rewarà kō pē ky'y. ²⁷Kee jaa Janejare'e remikuwa, oupewarà kō pē omojikuwaoka mǎ'ē: Pepy'a pupe Kiristu Āg ekoi, pejirovija ee remē. Ajawyi ikatuay wete penekoa rā, Janejare'e pyri peiko karuarua rā. Aepo jaa omojikuwaokapa oupewarà kō pē ky'y. Ikatuay wete ijayvukwerà peupewarà mō.

²⁸Ajawyi Kiristu rekoa oromojenu jenu pirujē mirà kō pē erokwa ipi, tojirovija ee kupa ky'y. Pirujē oromotekokuwa, oterē jē tokuwa Janejare'e ayvu kupa. Āmō, oromokasi kō jē tojireko katu ivo tekoua rupi toiko kupa. Orojimokasiay Kiristu tekokuwaa rupi imotekokuwa kō, āwisō ivo katuay wete toiko kupa. ²⁹A'evoa rē aposiko ywete aiko ipi. Kiristu kasia rupi aposiko eewarà mojenu jenu erokwa, emokasiay wetea rupi.

Pauru oposikoa rē oporegeta remēwarà

2 ¹Apota pekuwa aposiko ywete peupewarà mō mǎ'ē. Āmō, Rautiseja taa wānà kō pewarà mō aposiko ywete mǎ'ē. Āmō, pirujē nomā'ēive ere mǎe kō pewarà mō mǎ'ē. ²Janejare'e pē kee a'e peupewarà mō: “Tojipy'amokasiay neayvu rupi iko kupa”, a'e peupewarà mō. Āmō, “Tojiauvay ojeeve iko kupa”, a'e. Āmō, “Tojimotekokuwavay Kiristu rē, nemojikuwapa mǎ'ē rē teve”, a'e peupewarà mō Janejare'e pē ipi. ³Kiristu rupi tē Janejare'e omojikuwaoka wekoa janeupe. Nomojikuwaokai 'ete weewarà mijā. ⁴Aepo jaa amome'u pejē, āwisō “aje ipō” tapejē ywe'e tite e'ā poromo'e rǎ'āga mǎe kō ayvukwerà pē peiko. A'e kō otekokuwa maevo sō tite iko. Ajamā'ē tapejimoripeoka e'ā ijupe kō, a'e pejē. ⁵Age'e nijamā'ēi ojee, [jimopā'āga pupeaju rewarà mō]. Ajamā'ē e'āg peneve ekoi, āwisō kupe'e teipeaju pewyi remē. Ajipy'amogeta jē pene aiko. Kee jaa penewarà aenu: “Ojimokasiay Kiristu rē ojirovija ojeeve iko kupa ipi. Nopoi 'ete Janejare'e ayvu e'ea'y wyi kupa”, e'i mǎ'ē aenu. Eroryvay aepo jaa aenu remē.

“Janejare'e ojikuwapa joupe ky'y”, e'i mǎě

⁶Pejirovijapa Kiristu Jesu rè, Penōvijā ywete rōmō. Aekwerà ve jě tapeiko, a'e pejě. ⁷Eevejě ikō tapeiko nē. Tapejimokasi jě ikō pejirovija jě ee peiko nē. Tapejimo'yvay ikō ee nē. Āwitō Parasi pemotekokuwa jypy remě Janejare'e ayvu rè, a'e rupi tapeiko jě. Āmō, penereko katua rè penory mǎě tapemome'u Janejare'e pè ipi.

⁸Āmō, pejapyaka rǎī ikō kee a'e pejě mǎě rè nē. Tapejimoripeoka e'ǎ ikō poromo'e rǎāga mǎe kō pè nē. Kiristu rōwā omō'e kō. Wekoa rupi tē poromo'e rǎāga iko kupa ipi. Ija rǎāga mǎe kō ve omotekokuwa rǎāga kō, toporomo'e rǎāga kupa ipi. Ajawyi tapejapyaka e'ǎ ikō ijayvu kō rè peiko ipi nē, a'e pejě. ⁹Kee rewarà mō aepe a'e. Kiristu ojimojane yvy kyty uu remě, Janejare'e tē tesō janepyterà rupi ekoi. A'evo ojikuwa janeupe. ¹⁰Ajawyi, Kiristu revejě peiko remě, o'Āg tē tesō pepy'a pupe oinō āmē. A'e ywesō ikasiay iko mǎě. Pirujě ikasiay mǎe kō 'arà kytywarà rōmō ekoi, nomǎ'eytyi mǎe kō 'arà kytywarà rōmō tesō. Pirujě ija mǎe kō 'arà kytywarà rōmō tesō ekoi.

Janejare'e poropy'amotee mǎě rewarà

¹¹Juteu kō ojimosīpire'o Janejare'e koty rewarà kō mojikuwaparà rōmō iko ipi. Ajamǎ'ě a'evoa noekyi janeaiwererà janepy'a pupe wyi ipi. Kiristu āmē wekyipa peaiwererà pepy'a pupe wyi. Pemomoioka peaiwererà kasia wyi, eevejě peiko remě. ¹²Pejimojāmorioka Kiristu ayvu rupi remě, Kiristu revejě pemānō maevo sō tite peiko āmē ky'y.^f Yvy pupe pejeaty rǎī maevo sō tite āmē peiko. Āmō, āwitō Janejare'e omomoera Kiristu okasia rupi toiko mijě, āwīvo ve penereko Kiristu revejě peiko mǎe kō rōmō. Pemomoerapa mǎ'ě maevo sō tite peiko ky'y, awyje pepoerapa ipyau mǎ'ě vo tapeiko ky'y, penako'i ikasia rè peiko remě.

¹³Jypy remě itōkō nivoi tekoua rupi kōrijō tē peiko ipi mijā. Ajawyi, “Teāgwerà vo tē kupa”, e'i Janejare'e peupewarà mō āmē mijā. Eevejě rōwā peiko mijā, Juteu rōwā mǎe kō rōmō. Ajamǎ'ě age'e, Kiristu revejě peiko ky'y. Ajawyi māerā peiko karuarutà ipyri peiko ky'y. Janejare'e pirujě peaiwererà omoje'opa pewyi āmē ky'y.^g ¹⁴Janevota nijamoje'o kuwa'āi janeaiwererà janewyi ipi. Jajimomorijau 'atà tē epy rōmō jaiko mijā. Ajamǎ'ě Kiristu omoje'opa a'evoa omānōa rupi, yvyra jipokana rè omānō remě.^h ¹⁵A'evoa rupi teve ājāgai rōvijā nomokasiokai mǎ'ě omojikuwaoka. Emīgwai kō kasia ve nomokasiokai. Āmō, pirujě ijayvukasi mǎe kō nomokasiokai. Kiristu omānō mǎ'ě rupi a'evo ekoi. A'e ywesō ikasiay wete. A'evoa Kiristu omojikuwaokapa janeupe ky'y. Ajawyi, kee ja'e: “Haa! Nikasi miti ājāgai rōvijā Kiristu rovake ky'y!” ja'e ipi.

^f 2.12 Rom. 6.4 ^g 2.13 Eps. 2.1-5 ^h 2.14 Eps. 2.15

Poromo'e rā'āga mǎe kō ayvu rewarà

¹⁶Ajawyi tapejapyaka e'ā poromo'e rā'āga mǎe kō rē ipi. Kee e'i tite kupa: "Napejikoakui sō remē, nivoi peiko", e'i tite kupa ipi. "A'e ja'u ipi. A'e nija'ui ipi", e'i tite kupa ipi. Moma'eyvary pewarà mō teve aepo e'i kupa. Kee e'i teve kupa: "Janejare'e moetea 'arà rē jaja'a ipi", e'i kupa. "Āmō, jay pyau remē jaja'a ee ipi. Āmō, jimoava 'arà remē teve jaja'a ee ipi", e'i kupa ipi. "A'evo 'evo tijaiko ikenē", e'i tite kupa ipi.ⁱ ¹⁷Aepo e'i kupa remē, Janejare'e rekoa rupi katu ywe'e rōwā aepo e'i ajamā'ē kupa. A'evoa rupi rōwā Janejare'e janerereko katu ipi. Aje ywete Kiristu rē jajirovija remē tē janerereko katu ipi. [Ajawyi aepo e'i kupa remē, taperovija ywe'e tite e'ā ikō ijayvu kō nē, a'e pejē.]

¹⁸Kee e'i teve kupa. Nojimo'e'i rā'āga iko kupa. Āmō, yvapewarà kō omoe'e rā'āga kupa ipi. "Epouvaiawerà rupi āwivoa akuwa", e'i tite kupa ipi. "Emā'ē! Ore ywesō orokuwa. Āwitō yvapewarà kō oromoe'e ipi, āwivo ve pejē tapemoe'e kō teve", e'i tite teve kupa ipi. Aepo e'i epe penerōarō kupa. Ajamā'ē "aje ipō" tapejē ywe'e tite e'ā ijupewarà kō mō. ¹⁹A'e kō nojirovijai Kiristu rē oōvijā rōmō kupa. Nojimo'y'i ee kupa. Jane āmē jajimo'ypa ee mǎe kō rōmō jaiko. Kiristu pē kōrijō, "Orerōvijā ywete Ene", ja'e ipi. Ajawyi pe'itypyte eeve jaiko ipi. A'e tē janemokasi ipi. A'e tē janemotekokuwa teve ipi. A'evo Janejare'e opota tijaiko ipi, pe'itypyte rōmō.

Otekokuwa maevo sō tite mǎ'ē rewarà

²⁰Janejare'e pemojimo'ypa Kiristu rē tapeiko ky'y. Imānōa rupi omānō mǎ'ē vo jē pejē peiko eevejē. Omānōa rupi pemomoioka ājāgai rōvijā po pe wyi. Nikasi 'ete pejē ky'y, Kiristu kasia rupi peiko remē. Ija mǎe kō ve nikasi pejē. Pirujē ikasiay mǎe kō nomā'ētyti mǎe kō ve nikasi pejē. Ajawyi poromo'e rā'āga mǎe kō ayvu rē tapejapyaka e'ā peiko ky'y. ²¹Kee e'i tite kupa mǎ'ē: "Aā tapeporu e'ā. Āmō, aā tape'u e'ā. Āmō, aā tapepyy e'ā", e'i tite kupa mǎ'ē rē tapeja'a e'ā ky'y. ²²Moma'e rā rōmō rōwā aepo jaa. Ovote aepo e'i kupa. Janejare'e rōwā aepo jaa rē omoe'oka kō ipi. ²³A'evo poromo'e rā'āga mǎe kō ekoi ipi. Otekokuwa maevo sō tite tē kupa. Nojimo'e'i rā'āga teve kupa. Ojikoaku teve temi'ō iteetejē mǎ'ē wyi iko kupa ipi. Kee e'i tite kupa: "Janejare'e orytà ere, āwivo aiko remē", e'i tite kupa ipi. Otekokuwa rā'āga rupi tē a'evo ekoi kupa. Moma'e rā rōmō rōwā a'evoa ajamā'ē. Nijanepy'amotee kuwa'āi a'evoa ipi. Nijanemokasi'āi teve janeaiwererà reitypyyia rē. Ajawyi kee taoty a'evo mǎ'ē pē: "Otekokuwaway maevo sō tite tē āwī", taoty.

"Peneko ai pykwerà oje'opa", e'i mǎ'ē

3 ¹Pemānōma mǎ'ē vo 'ejē peiko mijā. Ajamā'ē age'e remē Kiristu rupi pepoerapa peiko ky'y. Ajawyi Janejare'e rena pē peikoa

ⁱ 2.16 Rom. 14.1-6

rã rè tapeja'a ky'y. A'e pè Kiristu ekoi ipi. Janejare'e 'ekatu kytyre wapy upa, Jõvijã wasu rômõ tẽ tesõ ky'y. ² Ajawyi Janejare'e rena pè peikoa rã rè tẽ tapeja'a katu peiko ky'y. Ikewarã rè rõwã tapeja'a ky'y. ³ Peneko ai ypykwerã opa ky'y. Janejare'e revejẽ peiko ky'y, Kiristu rupi. ⁴ Penerekoarã rômõ tẽ Kiristu ekoi ky'y. Kiristu ovãe mijẽ vvy pè remẽ, Jõvijã wasu rômõ ojikuwatã uu ky'y. Ojikuwa remẽ, pejẽ ve ipyri peikotã. ãmẽ sõi ipyri penoryvaytã Kiristu pyriwarã kõ rômõ peiko ãmẽ ky'y.

Peneko pyau rewarã

⁵ Ajawyi kee tapeiko ky'y. Tapeja'a mijẽ e'ã ikõ peneko aiwerã rè ipi nẽ. Pemãnõ mãẽ vo 'ejẽ tapeiko, peneko aiwerã wyi ipi. Jimomy'aa wyi. ãmõ, jitupia wyi. ãmõ, jipy'amogeta ai wyi. ãmõ, koivo kõ moma'e kõ rè jitupia wyi teve. "Ema'e rômõ kuwasi mijã", e'i mãẽ wemimotarã rè ywesõ oja'a Janejare'e wyi. ⁶ A'evoa rè oja'a mãe kõ noerovija'ãi Janejare'e ãmẽ ipi. Ajawyi Janejare'e omomorijau kötã. ⁷ A'evõ itõkõ peiko mijã. Penemimota ai rè ywesõ peja'a tite peiko ipi mijã. ⁸ Age'e a'evoa tapeityppyipa ky'y. Ma'e. Tapejikõõ ai e'ã peiko ky'y. ãmõ, tapejiapy'a e'ã pejikõõ rômõ ipi. ãmõ, toporomojaiwe e'ã teve peayvu rupi ipi. ãmõ, ayvu teminu tare'ã rè tapeporegeta e'ã teve. ⁹ ãmõ, tapewari e'ã teve ojiupe. Peneko ai ypykwerã opa.

¹⁰ ãwitõ kamisa aiwerã jaekyi imomo ipi. Ipyau mãẽ tẽ japyppy mijẽ. ãwĩvo ve peiko ky'y. Peneko pyau rupi tẽ peiko ky'y. Ajawyi ivo mãẽ rè kõiijõ tẽ tapejipy'amogeta ky'y. Ajaate peneinõgarerã weruparã mõ penerekotã. Ajaate pemotekokuwawaytã wekoa rè.^j ¹¹ Janereko pyau rupi jaiko remẽ, pe'itypyte mãẽ rômõ jaiko ikoty rewarã kõ rômõ. ãwitõ Juteu kõ, ãwĩvo ve Juteu rõwã mãe kõ. Ajawyi "ãmõ tẽ" taoty e'ã Kiristu rè ojirovija mãe kõ pè ipi, ojevo jẽ pirujẽ Janejare'e pè jaiko rewarã mõ. Taa wasu pewarã kõ. ãmõ, ka'a pè ojimoena mãe kõ teve. Temĩgwai ai kõ teve. Temĩgwai rõwã mãe kõ teve. Ojevo jẽ Janejare'e pè jaiko, Kiristu koty rewarã kõ rômõ. Pe'ite janerõvijã mãe kõ rômõ jaiko. Kiristu tẽ Janerõvijã rômõ ekoi. A'e tẽ o'ãg oinõ janepy'a pupe, janejãvijõ jẽ.

¹² Pejẽ Janejare'e koty rewarã kõ rômõ tẽ peiko. Emiauvay kõ rômõ tẽ peiko ipi. Oupe pepyteporo maekwerã kõ tẽ pejẽ. Ajawyi ãwitõ Janejare'e janeporijauesa ipi. Oja'a katu janere ipi. Nijanererõarõi ipi. Ikatusa rupi janerereko ipi. ãmõ, nijanemojikõtevẽi teve ipi. A'evõ ve tapeiko eruparã mõ tapeiko. ¹³ Ava mõ sõ pemojaiwe remẽ, tapeovajarĩ e'ã ãmẽ. Ivo tapeiko jẽ peiko ãmẽ. ãwitõ Kiristu "awyjepa" e'ipa peaiwererã pè, tãwĩvo ve pejẽ.^k ¹⁴ ãmõ, poroauvaya rupi ywesõ tapeiko ipi. ãmẽ sõi pejimo'ãgatutã ojee peiko ky'y.

¹⁵ Janejare'e opota ikatuay peiko pe'itypyte rômõ. Ajawyi manyvo peiko mãẽ rè peja'a peiko ipi remẽ, Kiristu tapepy'amopiryvypy katu penereko

j 3.10 Eps. 4.24 k 3.12-13 Eps. 4.2,32

ipi. Āmō, penoryvaya ikatuay penerekooka mā'ē, a'e tapemome'u Janejare'e pè ipi. ¹⁶Kiristu ayvu tapemojimoena pepy'a pupe ipi, a'e rupi katu tapeiko. Ijayvu tapemome'u ojiupe, ojevo jē tapekuwa āmē peiko, āmē ywesō tapetekokuwavy peiko. Āmō, tapemoe'e Janejare'e pejīgarà rupi peiko ipi. Janejare'e ayvu rē pejīga mā'ē rupi. Āmō, Jesu moe'ea rē pejīga mā'ē rupi. Āmō, Janejare'e Āg rupi pejīga mā'ē rupi. Wāi wāisō pejīga mā'ē rupi tapeiko ipi. Pejīga remē, “Nekatuay wete oreupe, Papa”, tapejē pepy'a pupe ipi. ¹⁷Āmō, Jōvijā Jesu koty rewarà e'eay rōmō tapeiko ipi. Ikatuay tapeporegeta mirà kō pè peiko ipi. Ikatuay mirà kō tapereko ipi. Āmō, tapemoe'e Janejare'e Jōvijā Jesu rupi tē ipi.¹

“Kee tijaiko Kiristu koty rewarà kō rōmō”, e'i mā'ē

¹⁸Kee a'e tarà mijē pejē, manyvo tijaiko Kiristu koty rewarà kō rōmō ipi. Imēma māe kō pè rā'ī a'età. A'e kō pè kee a'e. Pemēnà ayvu rupi ikō tapeiko ipi nē, Janerōvijā ywete koty rewarà e'eay rōmō, a'e pejē.^m

¹⁹Āmō, erekwapa māe kō pè teve kee a'e. Penerekwarà kō ikō tapeavay ipi nē, a'e. Tapemojaiwe e'ā ikō penerekwarà ipi nē, a'e pejē.ⁿ

²⁰Āmō, peākarāgwerà kō pè kee a'e. Pepapa ayvu rupi katu ikō tapeiko ipi nē. Pemāmā ayvu rupi katu ikō tapeiko teve nē, a'e pejē. Orytā Janejare'e āmē pene ipi.^o

²¹Āmō, kee a'e ipapa kō pè. Imāmā kō pè teve. Peākarāgwerà kō pemotekokuwa ipi remē ikō ikatusa rupi tapemotekokuwa kō ipi nē, a'e pejē. Ojīmokasità peayvu rupi āmē iko kupa.^p

²²⁻²³Āmō, kee a'e teve temīgwai kō pè. Taperovija katu ikō penōvijā ayvu ipi nē, a'e pejē. Pirujē e'i mā'ē rupi katu tapeiko. Ovae kōrijō tē rōwā e'evō tapeiko. Eā'ā rupi ve taperovija katu peiko. Tapeposiko katu teāmā penōvijā pè. Kee tapejē pepy'a pupe: “Erōvijā ywete Kiristu orytā ere aposiko katu erōvijā pè remē”, tapejē pepy'a pupe. ²⁴Janerōvijā Kiristu tē Penōvijā e'e rōmō. Ajawy ikatu imorya rē ywesō tapeja'a, penōvijā vvy pewarà kō morya wyi, a'e tē kāramō pemoepytā rewarà mō. Pirujē wemīgwai kō omoepytā. Omokatupa amātejē janerepy rā. A'evō rē tapeja'a jē peiko. ²⁵Āmō, poromosā'āga remē, nivoi māe kō omomorijautā, ijāvijō kō jē.^q

4 ¹Kee a'e teve wemīgwai rē ojimojōvijā māe kō pè. Ivo katu ikō penemīgwai pereko nē, a'e pejē. Temīgwai teve pejē. Penōvijā e'e vwapewarà remīgwai kō rōmō peiko.

Janejare'e pè japoregeta mā'ē rewarà

²Āmō, kee a'e jē pejē. Tapeporegeta py'yi jē ikō Janejare'e pè ipi nē. Tapemoa'u jē peporegeta ijupe remē ipi. Āmō, emime'ēgwerà kō wyi

¹ 3.16-17 Eps. 5.19-20 ^m 3.18 Eps. 5.22; 1Pe. 3.1 ⁿ 3.19 Eps. 5.25; 1Pe. 3.7

^o 3.20 Eps. 6.1 ^p 3.21 Eps. 6.4 ^q 3.22-25 Eps. 6.5-8

tapenearai e'ã ipi. Ee kō penorya tapemome'u Janejare'e pè ipi. ³ ãmē 'arà peve orerewarà tapemome'u ijupe ipi. Oropota Kiristu rekoa oromome'u jē nokuwaive mǎe kō pè, ike jimopã'ãga pupe oruju remē. Oromojenu rewarà mō itōkō oremopã'ã kupa mijã. Ajawyi a'evoa rē ikō peporegeta Janejare'e pè nē, a'e pejē. ⁴ Kee tapejē eupewarà mō: “Emokasi Pauru neayvu mojenua rē, ivo katu tomojenu”, tapejē Janejare'e pè eupewarà mō ipi. Manyvo Janejare'e opota tamojenu mǎ'ē rupi katu tamojenu aiko.

“Tapemome'u Jesu rekoa”, e'i mǎ'ē

⁵ Tapetekokuwa manyvo tapereko noerovijai mǎe kō imotekokuwa Janejare'e ayvu rē. Peporegeta ijupe kō remē, Kiristu rekoa ywesō tapemome'u ijupe kō ipi. ⁷ Ikatusa rupi tapemotekokuwa kō ipi. Tekokuwaa katu rupi peporegetatà ijupe kō ãmē ipi, ijävijō kō jē.

Pauru ojimorypa kō rē oja'a remēwarà

⁷⁻⁸ Eremikusiwarerà Tikiku rupi amonookatà pekoty. Oreremiauvay tē Tikiku. Orevejē Janerövijã remígwai rōmō oposiko katuay wete ipi. A'e ovãe pepyri remē, manyvo aiko maekwerà omojenutà pejē pemokasia mō ãmē ky'y. ⁹ Onesimu ve ãmō oromonookatà upi. Penena wãnerà tē itōkō a'e. Oreremiauvay teve a'e. Eretārã vo mǎ'ē Jesu koty rewarà rōmō. A'e kō pirujē omojenutà pejē, tapekuwa manyvo aiko mǎ'ē. ⁴

¹⁰ Aritaku jimopã'ãga pupe epyri tui upa. A'e opota ojimory pene eremikusiwarerà rupi. ãmō, Maku ve opota ojimory pene. Panape mōmirĩ a'u a'e. Kōitokō oo penesa remē, “Tapeja'a katu ikō ee nē”, a'epa itōkō pejē. A'e pewarà mō a'e. ¹¹ ãmō, Josue, Jutu eu teve mǎ'ē. Mokojejō opota ojimory pene eremikusiwarerà rupi. A'e kō kee jaa mojenua rē oposiko ereve: “Janejare'e tapemoēoka pe'arà kty”, ejaa rē. Nuvei ãmō Juteu kō a'evoa ereve oposiko mǎe kō. A'e kō tē epätavō ywete emokasiay ipi.

¹² ãmō, Parasi opota ojimory pene eremikusiwarerà rupi, pepytery pe wyi tē itōkō uu orepätavō mǎ'ē. Kiristu Jesu remígwai e'eay teve a'e. Oporegeta ywete Janejare'e pè peatyry pewarà mō ipi. Kee e'i peupewarà mō ipi:

– Emokasi kō tojimomãatã jē pene iko kupa. Pirujē neremimota rupi katu toiko kupa. Ojimotekokuwapa mǎe kō rōmō a'evoa toiko kupa. A'evoa rōmō teremokasi kō jē ipi, e'i Parasi Janejare'e pè peupewarà mō ipi. ⁷

¹³ Aje ywete, oposiko ywete Parasi peupewarà mō ipi, Janejare'e pè oporegeta mǎ'ē rupi. ãmō, Rautiseja taa wãnã kō pewarà mō teve oporegeta Janejare'e pè ipi. ãmō, Jerapori taa wãnã kō pewarà mō teve. Aenu oporegeta Janejare'e pè peupewarà mō ipi remē.

³ 4.5 Eps. 5.16 ⁴ 4.7-8 J.K.R. 20.4; 2Tim. 4.12 ⁵ 4.9 Prm. 10-11

⁶ 4.10 J.K.R. 19.29; 27.2; Prm. 24 ⁷ 4.12 Prm. 23

¹⁴ ãmõ, Rukasi ve opota ojimory pene eremikusiwarerà rupi. Poropõanõgarà tè Rukasi. Oreremiauvay teve a'e. ãmõ, Temasi ve opota ojimory pene. Mokopejõ opota ojimory teve pene eremikusiwarerà rupi mǎe kõ.^w

¹⁵ Aã rè oropota ojimory eremikusiwarerà rupi. Kiristu koty rewarà Rautiseja taa wǎnà kõ rè. ãmõ, orekõjǎ a'u Nĩpa rè. ãmõ, etǎ wryy pè ojimoaty Janejare'e moe'e ipi mǎe kõ rè ve. A'e a'e kõ rè oropota orojimory.

¹⁶ Pejẽ ypy eremikusiwarerà pemogeta. Pemogeta paire, tapemono Rautiseja taa wǎnà Jesu koty rewarà kõ pè rǎĩ, tomogeta ojimoaty kupa remẽ enu. ãwĩvo ve a'e kõ pè akusiwa mǎẽ tomonooka peupe, pejẽ ve tapemogeta pejimoaty remẽ enu. Ikatuaytǎ a'evõ peiko remẽ.

¹⁷ ãmõ, kee tapejẽ Akipu pè: “Janerõvijǎ ywete remĩgwai tè ene. Tereity e'ǎ ikõ neposikoa nẽ. Tereposiko jẽ, ajaate nemoawyjepa”, tapejẽ ijupe imokasia rõmõ.

Kareta moawyjepaa

¹⁸ Ije ywete aã Pauru rõmõ akusiwatǎ pejẽ ky'y, epo pè tè. Jimopǎ'ǎga pupe wyi akusiwa ajupa imono pejẽ. Ajawyi tapenearai e'ǎ ewyi, a'e pejẽ. [Eupewarà mõ tapeporegeta jẽ Janejare'e pè ipi].

Janejare'e ikõ tapenereko katu okatuaya rupi ipi nẽ.

[Awyjepa eremikusiwarerà ãmẽ ky'y.]

^w 4.14 2Tim. 4.10-11; Prm. 24